

KENYATAAN MEDIA**KEBERANIAN PEKERJA SWM ENVIRONMENT SELAMATKAN MANGSA BOT KARAM**

MELAKA, 11 Jun 2021 – Keberanian tujuh orang pekerja pembersihan SWM Environment Sdn. Bhd. (**SWM Environment**) menyelamatkan dua mangsa bot karam dalam kejadian di Pantai Puteri, Rabu lalu (9 Jun 2021) merupakan sikap yang wajar dicontohi.

Ketua Pegawai Eksekutif SWM Environment, Ho De Leong berkata, pihak syarikat amat berbangga dengan keberanian yang ditunjukkan pekerja-pekerjanya meskipun perlu berdepan risiko dan bahaya.

“Dalam kejadian tersebut, pekerja SWM Environment sanggup bergadai nyawa demi menyelamatkan mangsa yang hampir lemas. Nilai murni dan sikap berani yang ditunjukkan pekerja SWM Environment ini wajar dijadikan contoh dalam kalangan masyarakat.

“Tugas pekerja SWM Environment bukan sekadar memastikan kebersihan untuk keselesaan masyarakat awam, malah mereka juga digalakkan untuk menerapkan sikap prihatin dengan keadaan sekeliling dan menghulurkan bantuan sekiranya diperlukan. Syabas dan tahniah kepada semua pekerja SWM Environment yang bersusah payah dan bergadai nyawa menyelamatkan mangsa,” katanya.

Dalam kejadian kira-kira jam 9 pagi itu, dua orang nelayan hampir lemas apabila bot dinaiki mereka karam disebabkan angin kuat dan hujan lebat.

Bagaimanapun, kedua-dua mangsa berjaya diselamatkan oleh pekerja-pekerja SWM Environment dan orang awam yang berada di lokasi kejadian. Video insiden tersebut turut tular di laman sosial.

Sementara itu, salah seorang pekerja SWM Environment iaitu Zamri Mohd Don berkata, kejadian tersebut merupakan yang pertama seumpamanya berlaku sepanjang menjalankan tugas pembersihan di Pantai Puteri.

“Ketika itu, saya dan rakan-rakan sedang berteduh kerana hujan lebat sebelum dimaklumkan terdapat bot nelayan karam. Tanpa berlelah, kami terus berlari ke tempat kejadian untuk menyelamatkan dua nelayan yang sedang hanyut dilambung ombak.

“Dalam fikiran kami ketika itu hanya mahu memastikan mangsa selamat. Alhamdulillah, kedua-dua mangsa berjaya diselamatkan,” katanya.

Selain Zamri, enam orang pekerja SWM Environment lain yang terlibat menyelamatkan mangsa ialah Mohamad Azmi Yusop, Zulkefli Hamdan, Ridwan Rosli, Radiyah Mohd Noor, Juriyah Ibrahim dan Norfatihah.

Kejadian itu turut mendapat perhatian Ahli Dewan Undangan Negeri (Adun) Pantai Kundor, Datuk Nor Azman Hassan yang merakamkan penghargaan kepada pekerja-pekerja SWM Environment di laman sosial Facebooknya.

-TAMAT-

FAKTA

SWM ENVIRONMENT SDN. BHD.

SWM Environment Sdn. Bhd. (**SWM Environment**) telah dilantik pada tahun 1995 di bawah perjanjian konsesi yang dikawal di bawah Akta Pengurusan Sisa Pepejal dan Pembersihan Awam Negara 2007, untuk bertanggungjawab terhadap pengurusan sisa pepejal dan pembersihan awam di Johor, Melaka dan Negeri Sembilan.

Sebagai syarikat konsesi terbesar di Malaysia, SWM Environment, melalui tenaga kerja yang seramai 12,000 orang, berkhidmat kepada 27 pihak berkuasa tempatan, 1.5 juta premis kediaman dan komersial dengan lebih daripada 5.1 juta orang bagi liputan geografi 28,500 kilometer persegi. Untuk maklumat korporat yang lebih lanjut, sila layari laman web: www.swmenvironment.com.

Dalam usaha mengurangkan sisa janaan ke tapak pelupusan sampah, SWM Environment secara giat mempromosikan program-program alam sekitar yang berimpak tinggi seperti Pengasingan Sisa Pepejal Di Punca (SAS), kitar semula dan pengkomposan sisa makanan demi meningkatkan kesedaran awam di kalangan masyarakat umum.

Pada 2018, SWM Environment telah memperkenalkan program kitar semula berganjarannya, KITAREcycle, di ketiga-tiga negeri selatan Semenanjung Malaysia. KITAREcycle menggalakkan orang ramai untuk mengitar semula dan menerima mata ganjaran untuk lebih daripada 25 jenis barangan kitar semula yang termasuk kertas, tin aluminium, plastik, sisa elektrik dan elektronik. Mata ganjaran yang terkumpul boleh ditebus secara tunai melalui perbankan dalam talian. Orang ramai boleh memuat turun aplikasi KITAREcycle melalui *Apple Store* dan *Google Play Store*. Sila layari laman web: www.kitarecycle.com untuk mendapatkan maklumat lanjut.

Untuk keterangan lanjut, sila hubungi:

Noor Che Wah Ramli

Eksekutif Kanan Jabatan Komunikasi Korporat

SWM Environment Sdn. Bhd.

Lot 4B-17,18,19, Jalan TTC 26,

Kawasan Perindustrian Cheng,

75250 Melaka.

(Tel) 06-3350191

(Faks) 06-3350117

(Emel) wah.ramli@swmsb.com